

21. ILAIKITALAK, ORPURKEL, ENG'UDI O SUYAI NATAA OLASURAI, ENKOP E NKISILIGATA

**Enkikena 13-21, Enkigilata oo Nkitanapat 4:15 – 31; 6: 1ff; 7:1-16; 8:10-20;
9:4-6; 11:1ff; 34:1-5; Yoshua 1:1 – 7:9**

Ilaikitalak tomon o are ooshomo aikitalan Kanaan:

Ore pee eidip aishoo Enkai Musa inkitanapat toldoinyio le Sinai, nerretena iltung'ana pee ejing Kanaan amu ena apa enkisiligata naishoo Enkai Abraham, Isaak, O Yakobo. Neirriwaa Musa ilaikitalak tomon o are obo ake tiatua lelo gilat, nepuo ninche tiatua ina kop too nkolongi artam egira ayiolou enaika tenerasaki ina kop.

Ore pee eshukunyie lelo aikitalak, nenyorrakino pooki inchere ore Kanaan naa enkop napirr, naruko kule o naishi, kake ore tomon lenye neyau ilkiliku torrok inchere ore iltung'ana leina kop, o suntan e ina kop naa sapuki oleng', negol sii, nemeidim ake Isiraeli atimirr ninche. Ore ilaikitalak aare, Yoshua o Kaleb, neiruko ninche inchere kemirr ina kop to larrabal lelo mang'ati lenye, amu keretu iyiook Enkai anaa enaikuna te Misiri. Kake negolong'u olorere neany ejing.

Negoro Enkai oleng', neyau enkiguana shumata ninche Isiraeli. Neibalunyie sii ina rishata ajo inchere meata obo oitogiroyie ilarin tikitam ojing atua ina kop, enkisiligata. Naa kepuo sii Israeli aman orpukel o metuata ina ishoi pooki – ilarin artam.

Ilarin artam torpurkel/entoki neitu enyorraa Isiraeli

Neaku nemanaa Isiraeli. Nerikoo ninche Musa naa ore too rishat pooki neisho Enkai ninche endaa (manna o ingurlen naing'uaa keperr) o enkare tenkoitoi e nking'asia. Kake neingunyunguny ake olorere. Ore kulie rishat neingunyungunyaki Musa ejo "Kainyioo pee iyawua iyiook te Misiri pee kipuonu aye tele purkel? Amu mikiata enkare o mukateni – nimikiyieu manna!"

Negoro olaitoriani. Neirriu ilasuria atua olerere neiteru aony ninche. Neiteru olorere aaye nepuonu enetii Musa nejoki, " kitaasa iyiook eng'oki aingunyungunyaki Enkai tenebo iyie. Tasayiaki iyiook Olaitoriani, meiwuangakinyie iyiook kulo asuriaa." Neomonoki Musa iltung'ana.

Nejoki Enkai Musa meitayu enkitanyaanyukoto olasurai lo suyai obo neik ninye te shumata olchata. Ore ake pooki ng'ae oony olasurai, ore ake pee eing'or ilo asurai lo suyai, nejeu. Neitayu Musa olasurai lo suyai nepik te shumata ilo shata. Ore ake pee eony pooki ng'ae olasurai, ore ake pee eing'or ilo asurai lo suyai, nepok.

Enjing'ata e Nkop e Nkisiligata:

Ore enabayie, etulusoitie ilarin artam tiatua orpurkel, neyau Enkai Isiraeli olpolosie leina kop e nkisiligata. Nelo Enkai agelu Yoshua metoriko ninche ina kop.

Ore eton eitu eye Musa, neitadamua iltung'ana pee meserem ake aekata inkitanyaanyukot naitae inkaitin natii Kanaan, pee mewuasai ake nerikino ninche ing'ok enye, neitadamu ninche pee edamu enyorrata e Nkai, o enkisiligata naishoo Abraham, Isaka o Yakobo. Neibung' ilo ning'o teneyieu nemayiani. Neitadamu

ninche inchere keitame ninche Enkai tenepuo Aserem kulie aitin, kake ore ake pee eirridu, neing'oru Olaitoriani, nening ninye, neing'urrie ninche Enkai.

Ore eyia nejia, ore tialo erikore e Yoshua, nelang olosho loo Siraeli eim atua olkeju le Yordan ten kop natoyio neiteru arasaki ina kop.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Amaa te nkishui ino, kakua baa duoo oleng' kewan ino igira aingunyunguny?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko ena atini teneitodolua ajo keeta Enkai engolon sapuk? (keata enkitoria, enkidimata)**
 - o Nedamu Enkai ninche, nerreten sii pee epuo Kanaan. Eisiligie sii apa ninche ina kop.
 - o Keata sii apa Enkai enkitoria pee eirriwaa ninche meshomo orpurkel. neitu ninche eany epuo ilo purkel.
 - o Neisho Musa inkitanapat to Idoinyion le Sinai.
 - o Neisho ninche endaa, neisho enkare.
 - o Neata Enkai engolon pee eitame enkingunyunguny enye, airriu ilasuriaa. Meatai hoo obo oidima ailanyai enkitamio e Nkai.
 - o Keata sii engolon pee eishiunye olorere tialo nena onyot o lasuriaa. Keata Enkai engolon tialo inkitobirunot pooki. Ninye oitobirua ilasuriaa, kake keata eng'olon tialo ninche.
- **Kaji eiko teneitodolu ena atini nchere KEYIOLO Enkai pooki toki? (netii pooki wueji)**
 - o Etayiolo Enkai indamunot, o rorei tialo apa kulo tung'ana oingunyungunyita.
 - o Neyiolou Enkai ilkiliku oyau lelo aikitalak, neiyiolo inchere ilkiliku ootem enkirukoto oo Siraeli.
 - o Etayiolo sii Enkai inchere keidim ataretu Isiraeli metimira ilmangati lenye.
 - o Etayiolo inchere kepuo ninche aidapashari tiatua orpurkel too larin artam eton eitu eji ina kop enkisiligata.
- **Kaji eiko teneitodolu ena atini nchere eisinyati Enkai? (keitriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - o Ore tenkaraki enking'ung'uny enye, neiguanare Enkai ninche. Nemitiki Enkai pooki tungani botorr, meteleku ake Kaleb o Yoshua ejing atua ina kop e nkisiligata. Ore enatii, naa pee eidapashari ninche teilo purkel o metuata inaishai pooki.
 - o Keitame oshi ake Enkai eng'oki. Eitamio enkingunyunguny eimu eonyoto o lasuriaa. Neye iltung'ana kumok. Lasima pee eitame Enkai eng'oki.
- **Kaji eiko ena atini teneiteng'en iyiook inchere keata Enkai empiris? (kenyorrisho, keata olng'urr tialo ilaing'okok, nenana oshoke, neton ake eirorie oltung'ani)**
 - o Eitobirua Enkai olasurai lo suyai paa ore pooki ng'ae oing'urr nejeu.
 - o Eishoo ninche endaa, neisho enkare nerikoo ninche tiatua ilo purkel.
 - o Nemitu ninche tialo kulikae oshon egira aidapashari teilo purkel.
 - o Nengiriakino ninche alang enamut ninche pii. Nengiri tialo ninche erishata naado.
 - o Neining ninche, nening enkishirata enye pee eony ninche ilasuriaa.
 - o Neriku ninche enkop enkisiligata eidipa atulusoi ilarin artam.

- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaja)**
 - Etejo apa kepuo aye e ishoi e dukuya torpurkel, netaase ake ina.
 - Eibunga ina kisiligata enye e ina kop tialo Abraham, Isaka, o Yakobo anaa enatorripo iltung'ana lenyena. Keibung'ita apa ina kisiligata pee eyau Olaitajeunoni eimu eishoi e nkitok.
 - Nejo, ore pooki ngae oing'urr olasurai nepok, neaku ake nejia.
 - Ore hoo neitamio Enkai ina ishoi, kake eshomo dukuya arrip ninche ilo osho loo Siraeli laa ninche apa etejo kemayianie enkop pooki.
 - Neisiligishore sii tene Enkai inchere keshuku eishoi e are ina kop e nkisiligata, netaasa ake anaa enatejo.

KAINYIOO KINTENG'ENA ENA ATININ NAIPIRTA OLTUNG'ANI?

- **Tia oittoi eitodolu ena atini inchere ore oltung'ani naa olaing'okoni nenarikino enkitamioto e Nkai tialo eng'oki enye?**
 - Neingungunguny olosho loo Siraeli pooki rishata, hoo netaasaka Enkai ninche imbaa kumok oleng'.
 - Neany enyoraa inkisiligat e Nkai. Nelau ninche enkirukoto neiteru ainining ilng'ashi lenye o enkuretisho enye.
- **Tia oittoi eitodolu ena atini inchere keyieu oltung'ani Enkai, nemeidim aitajeu kewan?**
 - Meidim oltung'ani ailanya arashu atapaashare enkitamioto naa Enkai naishoru. Etalaikinote aitajeu ate te lelo asuriaa.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- **Tia oittoi kidol tena atini inchere keidim ake oltung'ani ayeu enetii Enkai te nkoittoi e Nkai? (anaa ake anayieu, neterretena Enkai?)**
 - Keidimi ake apa aitajeu ninche teneingorr ilo asurai, tenesuj ake ina oittoi naishorua Enkai.
 - Keidim ake atobik eishu tenenya ake ina naishorua Enkai meinosi, neoki sii.
- **Tia oittoi kidol tena atini inchere lasima pee eata oltung'ani enkirukoto, neirridu pee etumoki aitishipa Enkai, neitajeuni sii?**
 - Teneing'orr ilo asurai, kegira apa airridu tialo ing'ok enye, neibelekenya tenkirukoto aibelekenyakino ina oittoi naishoo Enkai.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Kaa pukunoto nagol oleng' kimpoto iyie Enkai? Tia oittoi etagolo te iyie pee isilig ninye? Indim atadamu embae naje ninoto olongungungunyi tialo Enkai, arashu tialo ae bae nikinchoo ninye iyie?
- Kakua oittoi tiatua enkishui ino igira adamunye imbaa inono makewan alang tenisilig Enkai? Tia oittoi? Kainyioo enkuretisho niata tialo ena bae? Tia oittoi kindim iyie atareto ena atini pee ing'uaa ina kuretisho? Imbalunye enkuretisho ino o enkirukoto nimiata te Nkai.
- **Tadamu tiatua enkishui ino, erubata nabo nigira abatatare misujita enayieu Enkai? Amaa ina nimiyieu nisuj Enkai, keitodolu ina ajo miata enkirukoto te Nkai tiatua enkishui ino?**